

1 PEDRO

1 Pedrojon, apóstolon i cha'an Jesucristo. Mic ts'ijbubeñetla ili jun, xñumelet jach ba la, pujuemet ba la ti Ponto, ti Galacia, ti Capadocia, ti Asia yic'ot ti Bitinia. ²Yajcabiletla che' bajche' tsi' wan ña'ta Dios lac Tat. Jini Espíritu woli' saq'uesañetla cha'an mi la' jac'ben Jesucristo, yic'ot ja'el cha'an mi la' mujlel ti' ch'ich'el Jesucristo. La' p'ojlesantíc i yutslel yic'ot i ñach'talel la' pusic'al.

An cuxul ba lac pijtaya

³La' subjic i ñuclel Dios i Tat lac Yum Jesucristo, come cabal tsi' p'untayonla che' ba tsi' yaq'ueyonla lac cha' ilan pañimil. Jini cha'an an cuxul ba lac pijtaya, cha'an tsa' cha' tejchi ch'ojyel Jesucristo ba'an chameño' ba. ⁴Come Dios mi caj i yaq'ueñonla jini lotbebilon ba la ti panchan ba' ma'anic mi' jilel, ba' ma'anic mi' bib'an, ma'anic mi' tsuculiyel. Mi caj la' wlaq'uentel ya' ti panchan. ⁵Come Dios woli' cantañetla ti ñuc ba i p'at'alel pejteletla mu' ba la' ñop, c'at'at' ti jini cojix ba q'uin che' mi caj i tsictiyel la' colt'antel tsa' ba i wan chajrabeyetla. ⁶Jini cha'an tijicñayetla, anquese poj jumuc'

jach mi la' wubin jujunchajp wocol mi che'ach yom Dios, ⁷cha'an mi' tsictiyel mi xuc'ul woli la' ñop. Ñumen uts'at i xuc'talel la' pusic'al ti Cristo bajche' oro mu' ba i jilel. Wolix la' ñusan wocol che' bajche' mi' ñumel oro ti c'ajc cha'an mi' q'uejlel mi mero oro. Che' ja'el che' ñumenix la' wocol, mi caj i sujbel la' ñuclel, mi caj la' c'uxbintel, mi caj la' q'uejlel ti ñuc che' mi' tsictiyel Jesucristo. ⁸Ma'anic tsa' la' q'uele Jesús, pero mi la' c'uxbin. Ma'anic woli la' q'uel wale, pero woli la' ñop. Jini cha'an ma'anic i p'isol i tijicñayel la' pusic'al tilem ba ti panchan, ⁹come woli la' taj la' colt'antel cha'an tsa' la' ñopo.

¹⁰Che' bajche' tsi' wan subuyob jini x'alt'añob, mi caj la' taj i yutslel i pusic'al Dios. Tsi' ñopoyob i ch'amben isujm bajche' mi caj i yujtel la' colt'antel. ¹¹Tsi' sajca'yob ti jun cha'an mi' ña'tañob baqui ba ora mi' caj ti ujtél jini tsa' ba i ya'la i yEspíritu Cristo am ba ti' pusic'alob. Come i yEspíritu Cristo tsi' wan subeyob i wocol Cristo, yic'ot i ñuclel mu' ba caj i taj che' ujtemix wocol. ¹²Tsa' pasbentiyob mach cha'anic i bajñel c'ajñibal tsi' cha'leyob t'an, pero cha'an mi'

cantesantel yaño' ba. Wale tsa'ix la' wubi jini jach ba t'an tic tojlel lojon. Tsac subeyetla jini wen t'an yic'ot jini Ch'ujul ba Espiritu chocbil ba tilel ti panchan. Jini ángelob wersa yomob i ch'amben isujm.

Yom ch'ujuletlela ti pejtelel la' melbal

¹³Jini cha'an, chajpan la' pusic'al. Yom yaxal la' wo. Junyajlel xuc'chocon la' ba ti pijtaya, come mi caj la' waq'uentel i yutslal la' pusic'al che' mi' palstal Jesucristo. ¹⁴Yom lajaletla bajche' alobob mu' ba i wen jac'ob t'an. Mach mi la' chan mel che' bajche' ti yamba ora che' maxto anic la' ña'tabal, che' ba tsa' la' jac'la i colosojlel la' pusic'al. ¹⁵Ch'ujul jini tsa' ba i palyetla, jini cha'an yom ch'ujuletlela ja'el ti pejtelel la' melbal. ¹⁶Come ts'ijbubil: "Ajñenla ti ch'ujul, come ch'ujulon", che'en lac Yum. ¹⁷Mi woli la' pejcan ti la' Tat jini mu' ba i mel pejtel winicob ti toj, mu' ba caj i meletla ti jujuntiquil che' bajche' an la' melbal, ajñenla ti baq'uen che' wa'to añetla ba' mach mero la' lumalic. ¹⁸Come ña'tabil la' cha'an, mambiletla cha'an ma'anic mi la' chan ñop jini lolom jach ba tsa' ba la ñopo ti la' ñojte'el. Mach mambileticla ti jini yujil tac ba jilel che' bajche' oro yic'ot sasac taq'uin. ¹⁹Pero mambiletla ti' ch'ich'el Cristo, letsem ba i tojol, che' bajche' juncojt ala tat tiñame' mach ba anic i chamel mi i bibi'lel. ²⁰Tsa' wa'choconti Jesús che' maxto anic tsa' mejli pañimil, pero tsa' poj tsictiyi ti jini cojix ba q'uin tac am ba wale cha'an mi' coltañetla. ²¹Cha'an ti' caj Jesús mi la' ñop

Dios tsa' ba i teche ch'ojoyel Jesús ba'an chameño' ba. Tsi' yal'ue i ñuclel. Jini cha'an clyaletla ti Dios. An la' pijtaya ti Dios.

²²Tsa'ix la' saq'uesa la' pusic'al ti' jac'ol i sujmlal. Jini cha'an mi la' c'uxbin la' wermanojob ti isujm. Wen c'uxbin la' ba ti jump'ejl la' pusic'al. ²³Come ma'anic tsa' la' cha' ila pañimil ti pac' yujil ba jilel, pero ti pac' mach ba yujilic jilel, jini cuxul ba i t'an Dios mu' ba i yajñel ti pejtelel ora. ²⁴Come ts'ijbubil: "Pejtelel winicob lajalob bajche' pimel. Pejtelel i ñuclel winicob lajalach bajche' i nich pimel. Mi' tiquin pimel, mi' yajlel jubel i nich, ²⁵pero i t'an lac Yum mi' yajñel ti pejtelel ora", che'en. Che'ach mi' yal jini wen t'an tsa' ba c subeyetla.

2 Jini cha'an clyala pejtelel la' jontolil yic'ot lotiya yic'ot i cha'chajplel la' pusic'al, yic'ot tsaytsayña ba la' pusic'al cha'an i wenlel la' pi'alob, yic'ot pejtelel u'yaj t'an. ²Yom lajaletla bajche' alal, poj ujtal ba i yilan pañimil, mu' ba i c'ajtin i chu'. Che'ach yom mi la' c'ajtin la' chu' ti Espiritu mu' ba i we'san la' pusic'al ti' sujmlal, cha'an mi la' coel majlel ti la' coltantel, ³mi sumuc tsa' la' wubi i yutslal lac Yum.

Jini cuxul ba Xajlel

⁴La'la ba'an Jesús, jini cuxul ba Xajlel. Winicob tsi' chocoyob ti isujm, pero Dios tsi' yajca come uts'atax mi' q'uel. ⁵Jatetla ja'el lajaletla bajche' cuxul ba xajlel. Woli la' wa'chocontel ti' yotot Dios. Yom ch'ujul ba motomajetla i cha'an

Jesucristo cha'an mi la' waq'uen ch'ujul ba i majtan Dios mu' ba i mulan. ⁶Come ts'ijbubil: "Awilan, woli cac' ti Sion jump'ejl uts'at ba Xajlel, yajcabil ba cha'an i xujc otot. Jini mu' ba i ñop ma'anic mi' cajel ti quisin", che'en. ⁷Jatetla mu' ba la' ñop, c'ux mi la' wubin Jesús. Pero ti' tojlel jini mach ba anic mi' ñopob, jiñach Xajlel chocbil ba cha'an jini xmel ototob. Pero Dios tsi' yotsa ti' xujc otot. ⁸Ts'ijbubil ja'el: "Jiñach Xajlel ba' mi' jats'ob i yoc winicob. Jiñach Ñuc ba Xajlel mu' ba i yac'ob ti yajlel. Come tsi' jats'ayob i yoc cha'an ma'anic tsi' jac'ayob jini wen t'an". Che'ach tsi' meleyob bajche' tsi' wan ña'ta Dios.

X'e'teletla i cha'an Dios

⁹Pero i yalobiletla, yajcabiletla. Ñuc ba motomajetla ti' tojlel jini Rey. Ch'ujul ba tejclumetla. I cha'añetla Dios cha'an mi la' sub majlel jini ñuc tac ba i melbal Dios, tsa' ba i palyayetla loq'uel ti ic'yoch'an ba pañimil. Tsi' yotsayetla ti' saclel i yumantel. ¹⁰Ti yamba ora mach i cha'añeticla Dios, pero wale i cha'añetla. Ti yamba ora ma'anic majch tsi' p'untayetla, pero wale tsa'ix i p'untayetla.

¹¹C'uxbibilet ba la, xñumeletla ti pañimil, yañach ba la' lumal. Ti wocol t'an mic subeñetla mach yomic mi la' jac'ben i colosojlel la' pusic'al mu' ba i cha'len guerra ti' contra la' ch'ujlel. ¹²Paasa la' ba ti uts'at ti' tojlel jini gentilob*. Che' jini anquese mi' palq'uetla ti jontolil, mi caj i ña'tañob wen ba la' melbal che' mi' tsictiyel lac melbal ti lac pejtelel. Mi caj i subob i ñuclel Dios.

Ac'la la' ba ti' wenta año' ba i ye'tel

¹³Añetla ti lac Yum, jini cha'an ac'la la' ba ti uts'at ti' wenta pejtelel año' ba i ye'tel ti la' tojlel, jini c'ax ñuc ba yumal ¹⁴yic'ot winicob wa'chocobilo' ba i cha'an, cha'an mi' yalq'ueñob i toj i mul xjontolilob, yic'ot cha'an mi' subeñob i ñuclel jini mu' ba i melob chuqui wen. ¹⁵Come yom Dios mi la' mel chuqui wen cha'an mi la' ñach'tesabeñob i tontojlel jini winicob mach ba añobic i ña'tabal. ¹⁶Libre añetla cha'an mi la' mel chuqui uts'at, mach cha'anic mi la' cha'len mulil, come x'e'teletla i cha'an Dios. ¹⁷Q'uelela ti ñuc pejtelel winicob x'ixicob. C'uxbin la' wermanojob. Bac'ñanla Dios. Q'uelela ti ñuc jini yumalob.

¹⁸X'e'telob, jac'benla i t'an la' yum, mach cojic jach jini uts'ato' ba mu' ba i c'uxbiñetla pero jini tsatso' ba i t'an ja'el. ¹⁹Come uts'at mi' q'uelonla Dios mi uts'at mi laj cuch wocol che' tic'bilonla cha'an i melol chuqui uts'at, che' ma'anic lac mul. ²⁰Mi woli la' jajts'el cha'an la' jontolil, zam ba la' ñuclel che' mi la' cuch jini wocol? Pero mi woli la' cuch wocol cha'an i melol chuqui uts'at, Dios mi caj i q'ueletla ti uts'at. ²¹Come paybiletla cha'an mi la' wubin wocol. Come Cristo ja'el tsi' yubi wocol cha'añonla. Tsi' pasbeyonla bajche' yom mi lac mel. Tsajcanla majlel. ²²Ma'anic tsi' cha'le mulil, ma'anic tsi' cha'le lot. ²³Che' ba tsa' a'lenti, ma'anic tsi' quexta a'leya. Che' ba tsa' aq'uenti wocol, ma'anic tsi' cha'le bac'tesaya. Che' jach tsi' yal'la i ba ti' wenta

jini mu' bΛ i cha'len meloñel ti toj. ²⁴I bajñel jach tsi' cuchu lac mul ti' bΛc'tal che' bΛ tsa' chami ti te', cha'an mi' jilel i p'ΛtΛlel mulil ti lac tojlel. Cuxulonixla cha'an yom mi lac mel chuqui toj. LajmesΛbiletla cha'an tsa' lojwi lac Yum. ²⁵Ti yambΛ ora tsa' sajtiyetla che' bajche' tiñame', pero tsa' la' sutq'ui la' bΛ cha'an mi la' tsajcan majlel jini Xcanta tiñame', jini Xcantaya mu' bΛ i coltan la' ch'ujlel.

Ajñenla ti uts'at yic'ot la' pi'Λl

3 X'ixicob, yom mi la' wΛc' la' bΛ ti uts'at ti' wenta la' ñoxi'al. Che' jini, mi ma'anic mi' ñopob la' ñoxi'al, mi caj i ñopob cha'an uts'at bΛ la' melbal, mach cha'anic la' t'an. ²Mi caj i q'uelob toj bΛ la' melbal che' mi la' jac'beñob ti uts'at. ³Mach mero la' ch'Λjlilic che' mi la' jal la' jol mi che' mi la' ch'Λl la' bΛ ti oro yic'ot wen bΛ la' pislel. ⁴Pero yom i ch'Λjlil la' pusic'al mach bΛ anic mi' jilel, jiñach i yutslel yic'ot i ñach'talel la' pusic'al. Jiñach c'ax uts'at bΛ ti' wut Dios. ⁵Come che' ja'el ti oñiyi jini ch'ujul bΛ x'ixicob tsa' bΛ i pijtayob i wenlel ti Dios tsi' ch'Λlayob i bΛ ja'el. Tsi' yΛc'Λyob i bΛ ti uts'at ti' wenta i ñoxi'al. ⁶Che'Λch tsi' mele Sara. Tsi' ch'ujbibe i t'an Abraham, tsi' pejca ti' yum. Jatetla i yalobiletla Sara, mi toj mi la' mel, mi ma'anic mi la' bΛc'ñan chuqui mi' yujtel. ⁷Che' ja'el winicob, ajñenla ti uts'at yic'ot la' wijñam. Q'uelela ti ñuc jini x'ixic anquese ñumen c'un bajche'etla, pero temel mi la' wΛq'uentel la' cuxtΛlel ti' yutslel i pusic'al Dios. Che'Λch yom mi la' mel ame mΛctΛntic la' woración.

La' wocol cha'an wen bΛ la' melbal

⁸Ti pejteletla yom junlajal la' pusic'al mi la' cha'len p'untaya. C'uxbin la' bΛ che' bajche' la' wijts'in la' bΛ. Yom uts la' pusic'al. Yom mi la' mel la' bΛ ti pec'. ⁹Mach yomic mi la' q'uextan jontolil, mi a'leya. Yom mi la' wΛq'ueñob i yutslel la' t'an la' pi'Λlob, come ña'tΛbil la' cha'an pΛybiletla cha'an mi la' wΛq'uentel la' wenlel. ¹⁰Come ts'ijbubil: "Majqui yom ajñel ti' tijicñayel i pusic'al, cha'an uts'at mi' ñusan q'uin, la' i tic' i yac' ti jontolil, la' i tic' i yej ti lot. ¹¹La' i cΛy jontolil. La' i mel chuqui uts'at. La' i sΛclan i wenlel i pi'Λlob cha'an ñach'Λl mi' yajñel yic'otob. ¹²Come lac Yum woli' wen q'uel jini tojo' bΛ. Mi' yubibeñob i yoración. Pero mi' contrajin jini mu' bΛ i melob jontolil".

¹³Mi bΛxetla ti' melol chuqui uts'at, ¿am ba majqui mi caj i tic'lañetla? ¹⁴Pero mi woli la' tic'Λntel cha'an ti' melol chuqui toj, tijicñayetla. Jini cha'an mach la' cha'len bΛq'uen che' mi' cha'leñob bΛc'tesaya. Mach la' mel la' pusic'al. ¹⁵Pero chΛn yumanla Cristo ti la' pusic'al. Yom chajpabil la' pusic'al ti pejtelel ora cha'an mi la' suben la' pi'Λlob baqui tilem la' pijtaya che' mi' c'ajtibetla. Subenla ti uts bΛ t'an yic'ot c'uxbiya. ¹⁶Ajñenla ti uts'at cha'an ma'anic mi' tejchel t'an ti la' pusic'al. Che' jini mi caj i yubiñob quisin la' contrajob mu' bΛ i pΛq'uetla ti jontolil, che' mi' q'uelob wen bΛ la' melbal ti Cristo. ¹⁷Mi yom Dios mi la' cubin wocol, ña'tanla uts'at mi la' cubin

cha'an wen ba lac melbal, mach cha'anic jontolil. ¹⁸Come Cristo ja'el ti junyajlel tsi' yubi wocol cha'an mulil. Jini Toj ba tsi' yac'la i ba ti chamel cha'an jini mach ba tojobic, cha'an mi' payonla ti' tojlel Dios. Isujmach tsa' tsansanti ti' bac'tal, pero tsa' cha' cuxtiyi ti jini espíritu. ¹⁹Yic'ot i yespíritu tsa' majli Cristo i subeñob t'an jini ch'ujlellob ya' ti' yajñib chameño' ba. ²⁰Jiñobach sajtemo' ba mach ba anic tsi' jac'ayob ti yamba ora, che' jal tsi' cha'le pijt Dios ti' yorajlel Noé che' ba woli to i mel colem barco. Waxactiquil jach tsa' coliyob ti ja'. ²¹Jiñach i yejtal bajche' mi laj coltantel wale ti ch'am ja'. Ma'anic mi' poc loq'uel i lumil lac pachlalel, pero mi' pasonla ti sac ti' wut Dios che' ñlach'al lac pusic'al cha'an tsa' lac subu lac ba ti' tojlel Dios. Tsa'ix tejchiyonla ch'ojyel yic'ot Jesucristo. ²²Tsa'ix majli ti panchan ya' ti' ñoj Dios. Jini ángelob yic'ot yumalob, yic'ot año' ba i p'atlalel, mi' yumañob Jesús.

Ts'acal yom mi la' pas i yutslel i pusic'al Dios

4 Cristo tsi' ñusa wocol ti' bac'tal cha'añonla. Jini cha'an yom chajpabil la' pusic'al cha'an mi la' ñusan wocol ja'el che' bajche' Cristo. Come majqui jach tsi' ñusa wocol ti' bac'tal tsa'ix i caya i mul. ²Ma'anix mi' chan jac' i colosojlel i pusic'al che' bajche' año' ba. Mi' cay tsucul ba i pusic'al cha'an mi' mel bajche' yom Dios ti pejtelel i jabil. ³Come jasalix jini q'uin tac tsa' ba la' ñusa ti' melol mulil che' bajche' jini sajtemo' ba mu' ba i

jac'ob i colosojlel i pusic'al yic'ot i ts'i'lel. Mi' cha'leñob chuqui jisil yic'ot yac'ajel yic'ot leco ba q'uiñijel, yic'ot lemoñel. Mi' melob leco ba i q'uiñilel dios tac. ⁴Mi' toj sajtelob i pusic'al cha'an ma'anix woli la' tsajcañob ti jontolil. Mi' p'ajetla. ⁵Pero mi caj i tojob yic'ot Dios mu' ba caj i mel jini cuxulo' ba yic'ot jini chameño' ba. ⁶Jini cha'an ti wajali tsa' subentiyob jini wen t'an jini tsa' ba chamiyob. Tsa' jisantiyob i bac'tal che' bajche' mi' chamelob pejtelel winicob x'ixicob, cha'an cuxul mi' yajñelob ti espíritu che' bajche' Dios.

⁷Lac'alix i jilibal pejtelel chuqui tac an. Jini cha'an yom mi la' wen ña'tan pañimil. Chac'a q'uele la' ba, cha'lenla oración. ⁸Yom mi la' wen c'uxbin la' ba. Jiñach ñumen ñuc ba, come che' mi laj c'uxbin lac pi'alob mi laj cuch cabal mulil. ⁹Mac'lan la' pi'alob. Mach yomic mi la' caj ti wulwul t'an. ¹⁰Dios tsi' yaq'ueyetla la' c'ajñibal ti jujuntiquiletla ti' yutslel i pusic'al cha'an mi la' coltan la' pi'alob, cha'an mi' tajob i wenlel ti Dios ja'el yic'ot i c'ajñibal ti chajp ti chajp. ¹¹Majqui jach mi' cha'len t'an, la' i cha'len t'an che' bajche' cantesabil ti' t'an Dios. Majqui jach mi' coltan i pi'alob, la' i coltañob yic'ot i p'atlalel mu' ba i yaq'uen Dios, cha'an mi' tsictiyel i ñuclel Dios ti Jesucristo ti pejtelel chuqui mi' yujtel. La' tsictiyic i ñuclel yic'ot i p'atlalel ti pejtelel ora. Amén.

La' i cuchob wocol xñopt'añoob

¹²C'uxbibilet ba la, mach yomic mi' toj sajtel la' pusic'al che' mi'

tilel i yilabentel la' pusic'al che' bajche' c'ajc. Mach yomic leco mi la' q'uel. ¹³Tijicñesan la' pusic'al come woli la' taj wocol che' bajche' Cristo, cha'an c'ax tijicña mi la' wubin che' mi' tsictiyel i ñuclel Cristo. ¹⁴Mi woli la' wá'lentel cha'an i c'aba' Cristo, tijicñayetla, come woli' yajñel ti la' pusic'al i yEspíritu Dios am ba i ñuclel. Isujm woli' ts'a'leñob Dios jini winicob pero jatetla woli la' ñuq'uesan. ¹⁵Che' jini, mach yomic mi la' lon taj wocol ti' melol mulil, mi tsansa, mi xujch' mi i ñusantel mandar, mi yamba jontolil. Mach yomic mi la' wotsan la' ba ba' mach la' wentajic. ¹⁶Mi an majch mi' yubin wocol cha'an ti' ñopol Cristo, mach i cha'len quisin. La' i sub ti ñuc Dios cha'an woli' coltantel ti Cristo. ¹⁷Come i yorajlelix mi' melob i ba i cha'año' ba Dios. Mi ñaxan mi' melonla, ¿bajche' mi caj i yujtelob jini mach ba anic mi' jac'ob i wen t'an Dios? ¹⁸Mi wocol mi' coltantelob jini toj ba winicob, ¿bajche' mi caj i yujtelob jini xñusa t'año' yic'ot xmulilob? ¹⁹Jini cha'an, la' i melob chuqui uts'at jini mu' ba i yubiño' wocol che' bajche' yom Dios. La' i yac'ob i ba ti' c'ab Dios, jini xuc'ul ba Xmel pañimil.

Cantanla i cha'año' ba Dios

5 Testigojon cha'an tsi' ñusa wocol Cristo. Mi caj caq'uentel c ñuclel yic'ot Cristo che' mi' tsictiyel. Ti wocol t'an mic subeño' ancianojob ti la' tojlel, come ancianojon ja'el: ²Cantanla i tiñame' Dios año' ba ti la' wenta. Mach cha'anic xic'bebiletla, pero

ti pejtelel la' pusic'al che' bajche' yom Dios. Mach cha'anic ganar, pero cha'an che' yom la' pusic'al. ³Mach yomic mi la' chañ'esan la' ba ti' tojlel jini tiñame' año' ba ti la' wenta. Pasbeño' ti la' melbal bajche' yom mi' melob. ⁴Che' mi' tsictiyel jini ñuc ba Xcanta tiñame', mi caj la' wáq'uentel corona i yejtal ba la' ñuclel mach ba anic mi' jilel. ⁵Che' ja'el, ch'iton winicob, ac'la la' ba ti' wenta ancianojob. Ti la' pejtelel chan mele la' ba ti pec' ti' tojlel la' pi'lob, come Dios mi' contrajin jini mu' ba i chañ'esan i ba. Mi' yáq'uen i yutslel i pusic'al jini mu' ba i peq'uesan i ba. ⁶Ac'la la' ba ti pec' ti' p'at'la ba i c'ab Dios, cha'an mi' yáq'ueñetla la' ñuclel che' ti' yorajlel. ⁷Ac'la ti' wenta Dios pejtelel la' c'oj'ol, come woli' cantañetla. ⁸Ña'tanla pañimil. Chac'a q'uele la' ba, come jini xiba, jini la' contra, woli ti pam ñumel che' bajche' colem bajlum woli ba ti jujuj t'an. Woli' chijtan i colojm cha'an mi' c'ux. ⁹Cha'lenla wersa ti' contra xiba. Xuc'ul yom la' pusic'al ti Dios. Ña'tanla lajal woli' yubiño' wocol la' wermanojob ti pejtelel pañimil. ¹⁰Dios am ba cabal i yutslel i pusic'al tsi' p'ayayetla cha'an temel mi la' wajñel yic'ot Cristo ti' ñuclel i yumantel mach ba anic mi' jilel. Che' ba tsa'ix la' jumuc' ñusa wocol, mi caj i ñuq'uesan la' pusic'al ya' ti' tojlel. Mi caj i xuc'chocoñetla, mi caj i p'at'esañetla. ¹¹La' tsictiyic i ñuclel yic'ot i p'at'alel ti pejtelel ora. Amén.

Cortesía tac

¹²Tsac mele ala jun cha'añetla ti' c'ab la quermano Silvano, xuc'ul ba

mij q'uel. Tsac ts'ijba jun cha'an mic
 xic'beñetla, yic'ot ja'el cha'an mi
 cac' ti c'ajñel jini isujm b' i yutslel
 i pusic'al Dios ba' c'ay'etla. ¹³Jini
 x'ñopt'añob mu' b' i tempañob i
 b' ya' ti Babilonia, tem yajc'abilo'

b' la' wic'ot, mi' yaq'ueñetla
 cortesía, yic'ot ja'el calobil Marcos.
¹⁴Aq'uen la' b' cortesía. C'uxbin
 la' b' ti uts'at. La' aq'uentiquetla i
 ñ'ach'talel la' pusic'al pejt'el añet b'
 la' ti Cristo.